



# Titihade

Madiha kha revista

Nº 2, 3

2007

Titihade kha wima  
Ehete kha wima  
Zesho kha wima  
Kasasa kha wima

Tuberculose kha wima

Aposentadoria kha wima





# Titihade

Números 2 e 3 - 2007

## Expediente

Redação: Frank Tiss/COMIN

Apoio lingüístico: Davi Kulina, Zuila Kulina, Erondina Araújo da Silva, Antônio Kulina

Capa: Christiane Tiss/COMIN

Fotos: Jörg Böhling/Agenda (páginas 4, 5, 10, 13, 20, 22 e 36), Tobias Goihl (página 39) e Christiane e Frank Tiss

Desenhos: Shope Kulina (capa), Relindis Agethen (páginas 16 e 17) e David Dennis (página 25)

Programação visual: Frank Tiss

Tiragem: 1000 exemplares

Administração:

COMIN

Rua Francisco A. da Conceição, 853

N. S. de Fátima

69880-000 Eirunepé-AM



## Titihade k̄ha wima

*Niha Madihadeni! Bikak̄siiri tikenak̄i? Owape bik̄a onani, owati ze nani, hidapana tiadeni ahiharō titihade onii aniza, timithemanani wahine.*

*Taide k̄ha Titihade nathini, Titihade onii pamani grava onaharo, Titihade 2, Titihade 3 nani. Naharo fita pamani k̄ha wima bazima ahiharō revistaza tiadeniza animanani.*

*Wima wa tikenani towi ehete k̄ha wima, Zesho k̄ha wima, álcool, k̄asasa k̄ha wima, tuberculose k̄ha wima, aposentadoria k̄ha wima nak̄i timithemanani towi. Naharo bazima wima tiadeni tethiza wa tikenani towi.*

*Ahiharō revista k̄ha hanonihipe pina COMIN k̄ha gramática k̄ha hanonihisha naharo, pina Titihade taide k̄ha hanonihisha naharo. Shamo tikenak̄hak̄i? Nizape, washi naha tik̄awatherani towi. Hidapana, tiadeniza nowe onapomaharo hanonihiti zati k̄ha:*

*Aniponipe nija, letra j zaraa, hidapana k̄hape n̄ha, letra h̄ za.*

*Aniponipe toh̄ui, letra hu zaraa, hidapana k̄hape towi, letra w za.*

*Aniponipe dsama, letra ds zaraa, hidapana k̄hape zama, letra z za.*

*Aniponipe coco, letra c zaraa, hidapana k̄hape k̄oko, letra k̄ za.*

*Aniponipe quiqui, letra qu zaraa, hidapana k̄hape k̄iki, nak̄i letra k̄ za.*

*Aniponipe ette, letra tt zaraa, hidapana k̄hape ethe, letra th̄ za.*

*Aniponipe ppeppe, letra pp zaraa, hidapana k̄hape p̄hephe, letra ph̄ za.*

*Aniponipe ssissite, letra ss zaraa, hidapana k̄hape sh̄ishite, letra sh̄i za.*

*Aniponipe icca, letra cc zaraa, hidapana k̄hape ik̄ha, letra kh̄i za.*

*Aniponipe qqui, letra qqu zaraa, hidapana k̄hape k̄hi, nak̄i letra kh̄i za.*

*Aniponipe neraha, letra h̄ zaraa, hidapana k̄hape neraa, letra aa nok̄honiza nowerani.*

*Ahiharō letraa toh̄izawaha naharo, motape poni h̄ini k̄ha.*

*Ahiharō wima wati tanisha tani wahinepe, owaza mari mari k̄enaharideni onipa: Davi, Ishanawa bedi, Zuila, Nodia bedeni, Erondina, Kak̄oda bedeni bote, Totoi, Ruizi bedi k̄enaharideni.*



## Ehete kha wima

Hidapana, tiadeniza ahie, ithome, ehete tamineni wati wati onani towi, Madihadeni kha, Madihadeni owaadeni kha ehete tamineni naki timithemanani towi.

Madiha animanawi, powadeni: "Hee, ehete ikha zamaza sibera teraa, bika tani" kekenanahari, "nazapa, pashini komene, hazire naki sibera tani towi" kekenanahari. Naharideni madiha bodidenizape, "madihadeni ehetezape pina pashini zenihitowira zazanapomana nahari". Neraa naharope maizanihi kha.

Tikhadeni zamaza ithome, ehete nowerezape, pina aba phehene sao hirawisha nawi towi, pina hahanihi tikaphiremanaharoshanani towi.

Naharo ehetepe, madihadeni, tiadenia tikahimana neherani, madiha owaadeni, bazimadeni nako ehete kahirizemanana kanawi.

Madiha shoke hipakhiri naharo hinededenipa, pina kariwa kha za Cinta Larga naharo,

powadenipa Rondoniaza, Mato Grossoza kehenahari.

Naharo pokhadeni ehete nawatoni wahinepe, taidepa tapa, poo, biha pha iikenapo naharo, naza wahano owaazapa pokhadeni tapa, poo, biha phahani bazi tani wahine. Nahari tapa, poo, biha phahani onini naki "chicha" kenawi. Naharo zotodepe, zama wahi hawi totohabakhi nahari, bani bedi pina hizama bedi damade. Nazapa hizama bedi oni iikanakanimana nahari, nawi zotodepa tamine kha amonehe ikananapiwi wahine. Nazapa Madiha Cinta Larga owaadeniza wa wa kekena nahari, powadeni imekotedeniza harawi.

Naharo ehete anizape, pina kabokerara kanaharisha kekena nahari, zome bakho totozimemana nahari, pina aldeiaza tobokezimemanaharisha nahari, bobaza shite nabotete kanemanahari, bazima. Nezape, aldeia hinededeni powadeniza pashinira da da iinabakhimana nahari. Nazapa boronizara shene tatarimana nahari.

Pokhadeni ehete naki abaziko kahari tani. Wada pama tohari nezape, shenenihitidimanimana idimanimana zanapoma nahari.



Boroniza, makhidehedeni aha wahi tokawa, aha wahi tokawa, neza amonehedeni powadeni idedeniza wana wana zanapozape, shene tatarimana nahari. Totori tori tori kenaha kakanimanahari, ahie bika tani wahine. Nahari totoriza nebokoshemana nazapa, ahiezana toshonarimana toshonarimana nahari.

Pokhadeni hhipa naki hiza tani, hipawi washikhiri nawi, siba tawi, ohizama kha harawi. Madiha aldeia onii kha pemimanawi da naharawi towi, poroko idemana tawi, takara idemana tawi, pato idemana tawi, wima nowereza. Cinta larga kha ozaza nako hawi tohamarowi towi, aldeia abarideni kha hhipa dama dama izanapomanahari, powadeni hipemanawi wahine. Ozaza nako hawi tohamarowi towi, khiwe nabinemanawi towi, hhipa towi, oza hinede kha hhipa bazima nahikemanawi wahine.

Ehete hika bote nezape, cinta larga owaadeni izamasha aldeia kha tamine amori bara iikena nahari, powa bakho ikenawi wahine. Pokha phowiza bakho tozimezanazapa, dama ikenahari, inahizokhimanahari, powa wariboza naki pasho zarara tani sho izemana tani. Naharo nathinipe, pashiniza da ikanakhimana tawi, nazapa zipho naki inazemana tani, "hari, ibezanana" kenawi kahi tawi, naharo pokhadeni ithome.

Naharo ithome nathinipe, aldeiakha tamine hizama, pokha amonehe inanapi nahari, shoke iizana nahari. Nazapa, makhidehe bazima shene tarimana tawi, hiri tarimana tawi. Naharo hirinihi hikezape, hizama shite inakhimana tawi. Nazapa, wishi nanarimana nahari, bazima nahari bani kahirizemanawi wahine.

Naharo ithome nathinipe, aldeia onii kha madihadeni tamineza boba bikakhiri naa da inakhimana tawi. Nema nezape, pokhadeni ehete hika tani.

Waimiri Atroarideni Roraimaza, Amazonaza kehenahari.

Powadenipa ehete iinawatomana naharo ehedeni bedideniza, wahano 3, 4 naharideni maderideni bika tani wahine. Taide iinahoremama naharo ehete tohani wahine, abaziko 3 mes nahari. Makhidehedeni nako kiki, boba iinawatomana nahari ehete wahine. Nahari bobadenipa ehete kha hihiridedeniza da tabakhirizawi wahine, Madiha kathade hawi honaharideniza nako da tabakhirizawi wahine.





Pokhadeni kikizape bani tabishe ani iikenarizana ha nahari, eheteza hipemanawi wahine. Naharo kikideni naki ehedenideni tatiza eetharizemana naharo, pina ehedenideni wada kahimanawi wahine, napimanazapa, powadenipa pina bani zedide bika tawi wahine, aba towi nako bika tawi wahine.

Ehete towahirani kha wada bakho tezape, Waimiri Atroarideni powadeni imekotedeni wahi tani wahi madimanahari towi athideni khakharizemana nahari. Nazapa, ehedeni imeideni ikathehizabakhahari aldeia oniideni wahi, watide hahawiriza nahari. Nazapa, aldeiaza madimanaza, zedi zedi totokena nahari, bani tatabishemana nahari, ehete wahine. Ehete kha wada bakho tabote neza, sibema ehete wahi bakho totokena nawi wahine.

Aldeia towahirani bakho tokenazapa, oza hohorede iinawatorizemana naharo.

Izamashape, aldeia kha hihiridedeni hiri hiri kekena nahari, totoriza nako tori tori kekena nahari, bazima nokho tokehenawi wahine. Nazapa, ehedenideni wiwithariza hashi tatari nahari. Naharo wiwitharipe nahari ehedenideni powadeni wahine.

Nazapa ehete ikahabakhaharideni nako bakho kekena nahari, hiri hiri kenaza. Ehedenideni imeideni taide totokehenapo nahari.

Nazapa, ehete ikahabakhaharideni ehedenideni, wiwithariza hashi tariwiza, kakabamawahemana nahari. Nazapa, imeideniza bani tabishe da iinabakhimana nahari. Zotode, oza kakawithadeza hawi totohezima nahari. Nazapa, aldeia abarideni powadeniza bizo, maro phehene da da iinabakhimana nahari.

Purus kha Madihadenipa bazima Kaxinawá nawato khiri nawi.

Wahanoza, zazahadeza nako Kaxinawadeni pokhadeni ehete iinawatomana naharo, powadeni athiza "katxanawá" kekena nahari. Kaxinawadeni athi: "naharo ehetepe ikha zamatapa towapiwi wahine", kekenana nahari.

Ehete wahine, nawi aldeia kha ikateizabakhia aha wahi powara, aha wahi powara kekena nahari. Makhidehedeni motadenipa zama dope wahi hahawi toha nahari, wabowi matani ka iihizemana naharo, wapini khowe iikena naharo, bodini naki shero iikena naharo, odini kahini wahine. Naharo wabowi matani aldeia wahi iikanimana naharo, nezape amonehedeni poo phehene iinawatomana nahari, naharo wabowi mataniza anini wahine wada 6 dia naharo. Nezape, aldeia kha Kaxinawa bazimadenipa kakabamawaha nahari, zome 5 naharo. Wada oniiza, ehete ikahabakhi naharideni bakho kekena nahari, bazima ze ze kekena nawi wahine.



Makhidehedeni motadenipa shene tarimanaza, zama dope wahi hawininekoshaza, aldeiaza bakho zimemanahari pina tokorime ophina tawi khasha kekenanawi wahine. Powadeni hiri hiri kekena nahari, "hoho, hoho" kekena nahari. Nazapa makhidehe motadenipa shishite, boba nahari nakhakha kekena nahari, tokorimedeni zokhemanawi wahine. Nazapa amazati shishite, boba nebobo kenaza, bazima wabowi matani aniniza kakabamawaha nahari. P o w a d e n i p a kakashiwehemana nahari, shene shene tatarimana naza, pashini ze ze kekena nahari.



Nezape, wabowi matani kha

poo phehene hikazapa, kaxinawadeni kapi kapi kekena nahari, wabowi matani odiniza. Powadeni athipa: "kapinihipe bika tani, ia dakorakhiri inani wahine", kekena nahari. Toshiwahabakhi neza, wabowi matani zoho iinananimana naharo, zama dopeza neboni wahine.

Kaxinawa idideni kha wima pina taide, kaxinawa noweremanapowipa, wabowi odini imeniza inawatobakhipohari, kekena nahari.

Ehete tohani wahine, taide makhidehedeni iinahoremanapo nahari, pina zama zedi totokena nahari, aba towi nako hahawi toha nahari. Nezape, eheteza, izamasha hihipakhimana nawi wahine, makhidehedeni motadenipa bani, aba da da iikena nahari, manako zomepe, makhidehedeni owaadeni zamatapa da da iikena nahari.

Pokhadeni eheteza, ithome onii naki hikeherani, pina makhidehedeni powara, amonehedeni ponira shene nanawahemana nahari. Nazapa, makhidehedeni taide hadani oniniza, poo oniza, tapa oniza hiri hiri kekena nahari. Nazapa, amonehedeni wima bikera tanikha hiri hiri kekena nahari, pina "ibokhiri tikenani, waidirakhiri tikenani, shamokhiri tikenani" kekena nahari. Nezape amonehedeni ponideni bihideni poni tashani mathoniza kaporineza, shene totozimemana naharo makhidehedeni kha ahie inahikemanani wahine. Ponidenikha hirinihiza, ponideni naki wima bikera tanikha hiri hiri kekena naharo, makhidehedeni tamine. Ponideni hazirema hiri hiri kekena naharo, makhidehedeni kha hirinihi ahimani tohani wahine. Nani zotodepe, bazima haha tokanirere kanahari.



Denideniza ithome bika tani kha anini, mahonana kha ithome.

Naharo ithome tazahanima, Denideni bazima hhipakhimana nahari. Taide, makhidehedeni poo iikawarimana napowi. Nazapa, amonehedeni poo da iinabakhimana nahari. Nezape, amonehedeni makhidehe haha iikanabakhimana nahari, hazirema wati wati kekena naharo, makhidehedeni bazima mithemanawi wahine. Nazapa, aldeia kha tamine boroni nokhoni wahi poo

sibema banima iakaro nahari, nazapa pokha Madiha wa wa iinabakhi nahari, hhipakhimanawi wahine. Nazapa, oza oniideni kha hhipa eekahonabakhimana nahari. Nazapa, hhipakhimana nawi wahine, makhidehe, zabisho powadenira, amonehe, zowato ponidenira hashi nanawahanimana nahari. Pokhadeni hiphakhe hikani nathinipe, ahie kakashiwehemana nahari.



Neza, shiwahabotepe, mahonana kha ithome totoha naharo.

Taide makhidehedeni wiza wahi mahonana towi hahawi toha napohari. Aldeiaza bakho nanimanazapa, boroni nokhoniza wa iinakhimana naharo. Nazapa, makhidehedeni mahonana bobini boroniza zoho iikanarizemana naharo, amonehedeni dama ikanemanani wahine. Zotode, amonehedeni mahonana bobini onii dama ikanemanani wahineraa, makhidehedeni mahonana hazirema mari iikahizemana naharo. Nezape, amonehedeni ponideni naki pina hazirezasha kenaharo. Nezape "ia karakhiri inana" kekena naharo.

Mahonana bobinideni bazima amonehedeni itadamabakhimane hizezape, manako amonehedeni wiza wahi mahonana towi hahawi toha naharo, boroniza bakho nanimaneza, wa iinakhimana naharo. Nazapa makhidehedeni ponidenikha mahonana bobini dama ikanemanani wahine. Nezape ithome hikani nathinipe, amonehedeni, makhidehedeni bazima hao totokehena nahari, totosowemana nahari nako.

Baniwadenipa Rio Negro tatini wahi kehenahari. Ehedenideni zabisho tokehenahonazapa, powadeni mari iikanabakhimana nahari, ahie nako totokawathera nahari.





Taide, makhidehedenipa zama dope wahi hahawi toha nahari, awa bono towi. Amonehedeni poo phehene iinawatomana nahari. Zotode, makhidehedenipa bihini wahi hahawi tohezifa nahari, pokhadeni totori, hoho towi. Naharo totori, hoho bihini wapiza awatora tee iinahinimana naharo, amonehedeni, ehedenideni khi tokenaharawi nophine, ophina teza, pina khi kenazapa, zokhemana tawi.

Makhidehedenipa totori, hoho dama iikena nazapa, powadeni nawebezomanahari, oraza.

Ehedeni zabisho tokehenahonaharidenipa etero bobiniza nokhodeni shoke iinarizabakhi nahari, khi tokenaharawi wahine. Nazapa, makhi hadawi bote hikapoharideni towi wa wa iinabakhi nahari. Nazapa, makhidehedeni bihini wapiza animanaharideni hahawi mora nahari, boroni wahi. Boroniza, kakabamawahani nahari, totori tori tori kekena nahari, hoho hoho kekena nahari. Makhi hadawi boteza bakho tokenaza, totori, hoho nahari wa iinakhimana nahari namiza. Nazapa, makhi hadawi bote etero bobini dikha iinarizabakhi naharo, ehedenideni nokho kha. Nazapa, powadeniza totori, hoho tawimari mari iikanabakhi nahari. Ahiharo wima nathinipe, ehedeni zabisho tokehenahonaharideni oza bodiza abaziko kanaharimanawi wahine tokawatherawisha tawi wahine wima siba tani, pina idideni kha wima. Kiki, wiwizo naharo kha wima naki tokawatherawi wahine. Pokhadeni hihipa awa bono powara.

Abaziko kahika bote naza, makhidehe hadawi botedeni zome hiri hiri kekena nahari, maithakhazama kha ahie. Makhidehedeni owaadeni tori tori, hoho kekena nahari, poo phehene nako ze ze kekena nahari. Nazapa, sao, kashi tahierini hiri hiri kekena nahari. Zotode, sao, kashi bizoza zabishodeniza da iinarizabakhi naharo. Izamasha, mahi khahonapowi, makhidehedeni hadawi botedeni zabishodeniza wati wati totokena nahari, powadeni madimanawisha tawi wahine. Naharo wima hikezape, makhi hadawi bote kokoshiza zabisho bakhodeni bazima koshi koshi iinabakhi nahari.



Nazapa, zabisho imenideni iinawebezorizabakhimana nahari hidepeza. Tezeme nako, powadeni tatiza eetharirizemana naharo, anopi aphani naki powadeni bihi, ishoza shoke iinarizabakhi naharo. Nazapa, makhidehedeni hiri hiri kenazapa, zabishodeni hahawima nahari boroni wahi.



Powadenipa wiwizo kakahiri nahari, inawatomanapoha nahari. Nazapa wiwizo eetimana nahari zowatodeniza, pokhadeni amonehe tokehenani wahine. Naharo nathinipe, aldeia abarideni bazima hiri hiri, shene shene kekena nahari, wawati zemana nahari.



"Zabishodeni hidapanapa makhidehe tokehenawi" kekena nahari, Baniwadeni athi.

Maithakhazama, Baniwadeniza ehete onii naki aniharo, powadeni athiza "pudali" kenahari. Naharo eheteza, aldeia abarideni powadeni imekotedeni, waborideni tezehe poo phehene, zawida phahani ze ze nanakhimana nahari, hiri hiri kekena nahari, wawati zemana nahari. Naharo ehetezape, wati wati kakana nahari, hazire bazima, wima shiri bazima nowerani wahine kekena nahari.

Baniwa hadawi botedeni athidenipa: "ehete 'pudali' noweranizape, hazire, wima shiri towapini", kekena nahari.

Zuruahãdeni Purusza madimanawi, powadeni athi pina Madiha athisha kanikhimerahari.

Powadeni nako, pokhadeni ehedeni zabisho tokehenahonazapa, ehete iinawatomanana naharo. Taide, makhidehedeni bazima bani towi, aba towi hahawi tohapo nahari, aldeia abarideni bazima hihipakhimana nawi wahine. Naharo hihipa nathinipe, bazima hiri hiri, shene shene kekena nahari.

Nazapa, ehedeni zabisho tokehenahonarideni tatideniza, tezeme eetharirizemana naharo, wepe, bani ephe naharo nawatoni. Nazapa, makhidehedeni, powadeni imekote harahari, ehedenideni itakoshimana nahari.

Nazapa, powadeni domo poriji wahine, phowi memenisha shoke ikanemanawisha tahari. Hidapana, makhidehe powadeni imekotedeni akho iikanabakhimana nahari, pina haziresha naraa, pokhadeni ithome. Naharo hazirezape, makhidehedeni, zabishodeni imekote haraharideni, pina waphasha kekena nahari.

Naharo ehete hika bote nezape, amonehedeni zabishodeni bihini wahi hapi tonanabakhiwi wahine, iakhezaphabakhihari. Hahapi nathinipe, amonehedeni zabisho iinawithomebakhimanaza, amonehedeni zabisho tatideni konesha inabakhimanahari, hidepeza iinawebezobakhimana nahari.



Hee, taide, Madiha owaadeni bazima pokhadeni ehete iinawatomana naharode, wahanoza, zazahadeza. Hidapana nako, Madiha owaadeni bikakhiri nazapa, pina bazima madimanawisha tazapa, pokhadeni ehete iinawatomana zanapoharo.

Naraa, Madiha madimanawisha taharazapa, pokhadeni ehete naki tosibera tani.

Ehete kha nakhashera taharipa, komakhiri naharideni. Nema nezape, aldeiaza ehete nowerezape, pokhadeni madie naki tokhanisha teheranitime. Ehete nowerarizape, da naraa, ikha madie bika teherani, watizee naki biki tee ikahiharo. Neraa, ehete anizanaponizape, watizee iikahi naharo, ehete nathini nako, ikha tarabaia denima bika tani towi.

Madiha kha comunidadedeniza, bani, aba, poo, ithome ani, wima bika tani kha ani, naraa, eheteza zamatapa sibema anihari, ithome, ahie naki kahi tani.

Ibodi wawatoma naharo kahi tani, pina ikha hhipaza, pina ikha tarabaiaza, ikha madieza, naraa, ehetezape, nowerani, pina ithome ponira, watizee ponira aniharo.

Ehetezape, Madiha kabikerara kanahari. Ehetezape, Madiha kekerikhi nahari, aldeia oniideni kha. Hee, ehetepe bika tani, Madiha owaadeni nawato inani wahine, eheteza, bazima wawati zemana naza, bazima wati wati kakana naza. Naharo, ehetepe bika tani Madiha bazima dakorakhiri nawi wahine, karakhiri kenawi wahine.

Ehetepe bika tani, zabishodeni, zowatodeni: "Hee, iape Madiha ikehenani, ikha ehete, ahie, ithome ineboni da neherani!" kenawi wahine. Ehetezape, zabishodeni, zowatodeni denima totokawathera nahari. Ehetepe pina kiki imenisha nani, naharo kiki bodiza maithakhazama kha wima hikeheraharosha nani. Naharope, zowatodeni, zabishodeni eheteza hiri hiri, shene shene kekena nazapa, iithomemana nazapa, denima dakorakhiri kenawi towi.

Naraa, ehetepe nowerezape, zabisho, zowato kenaharideni kariwa kha shenenihitowira kekena nawi towi.

Owape obodi wati nani, ehete nowerezape, Madiha siba taa maithakhazama kha ehete kha watizee towi kenazapa, "Hari, forró shene inana!" kekena nahari nititide. Owaadeni, "Hari, kariwaza casasa mitha inana!" kekena nahari nititide.





Naraa, kariwa kha shenenihipe pina ehetsaha neherani. Casasa kha zenihhi naki pina ehetsaha neherani. Kariwa kha sheninihizape, Madiha zoto piko piko kekena nahari, zabisho zowato towi kekena nahari, manako zowato zabisho towi kekena naharo, denima nowerani, pina zamatapa nowe, pina poo phehene, zawida phahani nowe, ithome nowe, wima bika tani kha naki nowerani.

Neraa kasasa zenihipe denima waidira tani. Taide, eti zeni, haha inani naki, neraa amazati ikha wima bika teherani, nezape, hazire toha tani.

Madihadeni "ehete inawatona!" kenawipa, taide wizaha imeni iinamawato mana napoharo. Hidapanapa, Madiha animanawi, pokhadeni wizaha kha poo sibera tani, imekotedeni kha aldeia wahi hahawi toha nahari, poo hipade. Nema nezape, ehete naki nowerani towi, poo noweraza.

Wima nema naharo: "Hee, niza, poo siba taza, ehete onawatoni towi", naharo wimape pahireherani. Madiha bazima nawato khiri kenawi, "ehete bika tani inawatona" kenawipa, taide wizaha imeni iinawatomana napoharo, wahano owaaza ehete anini wahine. Madiha owaadeni bazima nako nama kekena nahari.

Madiha nawatokhiri kenawi paha nawi ehete kha wima, pina ahie kha wima, hirihiri kha wima, ithome kha wima. Tiadeni "ikha ehedenideni madimanawisha tawi wahine" tikenaharorane? Nezape, ehetepe tinebomana teherahi, tikhadeni ehedenideni bazima dakorakhiri kenawi wahine, bazima "hee, ikha zamaza eti ze nani, ikha zamaza imadinisha tani" kekena nawi wahine.

Pepehi okha wima.





## Zesho kha wima

Hidapanape, Zesho tamine wati onani towi, kariwa kha nako "Jesus". Madiha owaza: "Darawi, pahishakhi kariwa kha wima Zesho tamine, Zesho cruzza zokhehari kha wima, pecado kha wima, meme kha wima", kekenanaha nahari.

Hee, kariwa a n i m a n a w i , "imithanisha tana" kekenanawi, bíblia kha wima Zesho tamine, pokha marinaha. Naharideni kariwa "bazima nawato inanisha tana" kekenanawi, powadeniza hira neraa, "nema nee imithazanapona" kekenanawi. Naraa kariwa owaadenipa bíbliaza khi kenaharo powadeniza bika



taharora, powadeni athira wati wati kekenanahari. Neraa powadeniza bikera taharope, inebokhimemanehe zanaponi naharo.

Kariwadeni athideni nama zanapoma nahari Madihadeniza: "athizapa waidirakhiri nawi, bikeharawi, wati shamo tawi, showe tawi, ibokhiri nawi", kekenanahari. Hidapana nako kariwa sibera taa wati wati kenahari: "hee powadeni nama kenana, pokhadeni hihipa, etero, ithome, athi, ahie, idideni kha wima poni nema nana!", kekenanahari. Naraa, Kariwa siba taa nakhasherakhiri nahari Madihaza. Naharideni kariwadeni nako, Madihadeniza wati wati kenahari: "hee, bíblia kha wima nema naharo: tiadeni Madihape tiphiremanani, idideni kha tonawathanihi bikeherani" kekenanahari, "kariwa católicoma tikenahi" kekenanahari, naraa kariwa owaadeni: "kariwa evangélicoma tikenahi" kekenanahari.

Maithakhazama, Zesho aniza nako, kariwa animanahari, "bíblia khikhideni ikehenani", kekenanahari nade.



Nahari kariwadeni oniideni escriba, fariseu kenaharideni nade. Naharideni kariwadenipa kariwataminerakhiri-naharideni iinaphinabakhimana nazapa, kariwataminerakhiri-nahariza zoshe zoshe zanapomanahari nade, pokhadeni zinero, zepedeni-tahi Deo kha oza kakawadedeniza da da kekenanawi wahine, nade.

Zeshopa escribadeniza, fariseudeniza boke tawi nade. Bibliaza, Mateus kha evangelho kha capítulo 23za papeo wa inezape, khi khi inani, Zesho powadeniza bokehari nade. Zesho athi: naharideni kariwa, "ia Deo khikhidedeni ikehenani" kenaza, pokhadeni wimaza bikeranihia tobazihe zanaponi naharo nade, zoshe zoshe zanapomanaza neraa wima bikanihi khape, watide

zoto peideniza noweremanahari nade. Zesho athi, wima bikanihi khape pama-tohari nee animanani, zoto peideniza, pina bazima ia ani tabakhimanawisha tawi kha wima, pina eti wanee kha wima, pina Deo kha dakorenihi kha wima, nade, Mateus kha evangelho kha capítulo 23za, versículo 23za.

Zeshopa pina escribama naharaha, pina fariseuma naharaha nahari nade. Zeshopa zoshe zoshe naharawi nade, Madiha bodideni ohi ohi kenawi wahine, Zeshopa wati wati nanaha nahari nade bazima taminerakhiri naharideniza, zoto peideniza tobikehezanaponi nani wahine. Nezape, bazima ia ani tabakhimanawisha tawi kha wima, eti wanee kha wima, Deo kha dakorenihi kha wima wati wati nanaha nahari nade.

Hidapanape tiadeniza mari onanisha tana, naharo wima, Zesho kha wima, timithemananisha tani wahine.

Taide, bazima ia ani tabakhimanawisha tawi kha wima tamineni wati onana onaharo.



Zeshopa nakashera tawi kariwa sibera taa madimanawisha tahariza, naraa kariwa, madiha siba taa madimanaharawisha tahariza. Zesho powapa bazimadeni madimanarizawisha tawi wahine, naharo wima towira nahari. Naharope, bazima nama tophiwi wahine, bazima ani tabakhimanawisha tawi wahine, nahari nade.

Naharo nema nani wahinepe, kariwa kha, madiha kha taminedeni bazima animanarizawisha tawi wahine pahireni, naraa t a m i n e d e n i i m e k o t e d e n i z a r a , teshedenizara bikakhiri nawipa da naharawi. Neraa naharope kahi tani kariwaza. Nezape Zesho



maithakhezamadeni kha tamine bote Herodesza wa inahari "raposa". Raposapa pina kahawirima nahari nade, ophina tawi, khi tinahararaa, tizepe-tahi boti boti nawi towi, nade.

Bíbliazape, Marcos kha evangelho kha capítulo 10za, Zesho kha wima anini, powa teshedeniza wati wati nahari nade, nema naharo wima: "Tiadeni nawatoto tinani, kariwadeni kha taminedenipa bazimaza zoshe zoshe kena tawi, zoto peideni ohi ohi kenaraa, nama naa powadeniza denima zoshe zoshe kena tawi. Taminedeni kha bihi-akhodedeni nako bokekhiri nahari nade, zoto peideniza. Neraa tiadenizape nema tikenani da neherani. Tia 'oshonikhimana' tanipe, tia 'denimama onana' tanipe, tia bazimadenikha bihideni-akhode tihahi", nade, Zesho athi.

Tamine imeibotedeni zinero imenibote hinededeni, soldado siba tawi zozoshedeni, naraa Zeshopa taminedeniza "hee" naharawi nade, kaphina taharawi nade. Zesho athi pina pahishee kha taminepa powa teshedeni, pokha madihadeni bihideni akho kanawisha tawi, nade. Ahimanezape, Madihadeni kha idideni nako wati wati kekenanahari nade, tamine bika tawi wahine. Hee, shamokhiri naraa, idideni kha taminedeni pina Zesho kha wimazara hee kenaharisha nade, pina kariwadeni kha taminedeni kenahararaa, pina prefeitodeni, governadordeni kenahararaa, idideni kha taminedenina madihadeni bihideni akho kanawisha tawi, nade.



Zesho wati wati zanapohari nade, wima waidiree kha hinededeniza, pina governodeniza, pina Deo kha oza kakawadedeniza, pina fariseu, escribadeniza. Nazapa, powadeni bazima tokatasheraa hika nazapa, zoshe zoshe kanimahari nade, “Zesho zokhena” kenahari, nazapa dama ikenaza, koshi inakhimanawi nathipa, awa porimakoshananiza, koba izanemanahari nade.

Hidapana Zesho kha wima onii khi inani towi, eti wanee kha wima, pina titeshe bihi akho tikanani kha wima.

Naharo wima, Zesho wati wati zanapohari nade, neraa powa nako pokha madihadeniza, madiha owaadeniza wati wana tahari nade.

Zesho khahimawi biki tawi nade kariwa kha taminedeniza, papeo nawatokhiri naharideniza, tataminedeniza khi narizawi nako biki tawi nade. Zeshopa zoto peideniza wati wati nanaha nahari nade. Zeshopa zoto peideni nokhoniza napihari nade, powa totozona nawi nako bani bedi kha ozaza toshonahari nade. Zoto peideni nokhoniza madirizahari, tarabaia nako tarabaia nanaha nahari nade.

Zesho nako tokhahari nade, madiha owaadeni kha zama wahi tokhezimahari nade, cananeiodeni wahi, samaritanodeni wahi, gregodeni wahi, nahari nade. Maithakhazamape, “nahari madiha owaadeni hiremanawi” kenaraa, Zeshona powadeniza khide khakhariza nahari nade.

Powadeni nako pina Madiha Kulinasha nahari nade: Kariwa siba taa “iape ikahimani da neherani” kenawi nade, “powadenipa Deo kha ikehereherani” kenawi nade.

Naraa Zeshopa zoto peideni khide totokha nahari nade. Zesho kariwadeniza mari nazapa, powa pina “tiadeni pina samaritanosha tikenahi!” nahari nade. Naraa samaritanodenipa maithakhazama kha zoto peideni.





Hee, maithakhazama, escribapa, pina Deo kha wima mamaride nade, powa Zeshoza wati tahari nade: "neheko onawatowi wahine pina ozokheza, Deo owa ani nani wahine?" nawi nade. Nazapa Zesho powaza: "neheko bíbliaza khi tinaharitha?" nawi nade. Nazapa nahari makhidehe: "bíbliaza khi onaharo nema naharo: Deozara teti wana tahi, izabora-kha-deniza naki eti wana tani wahine, pina iaza eti wana taharoshah tani wahine", nahari nade. Nazapa Zesho wati tahari: "hee, nema tahi!" nahari nade. Nazapa nahari makhidehe: "Naraa komanahari 'ozabora kha'?" nahari nade.



Nazapa, Zesho wima wati tahari nade. Naharo wima hima naharo nade: Makhidehe ohari naa tokhahari nade, cidade imeniza, cidade oninipe Jerusalem, cidade bedeni wahi tokhahari, naharo cidade oninipe Jericó. Naharo pokha hawiza, bobotidedeni powa dama ikenaza, idakhimanahari, zepe-tahi inakhimana hika, pokha etero naki shiti ikenaharo, nade. Nazapa watia bote naa, inebomanahari nade.

Zama hama nazapa, Deo kha oza kakawade, pina padresha nahari, pina pastorsha nahari, khahonahari, naraa makhidehe ponakoshawiza khi naharawi, pina ikathoma, toshonikhimahari nade. Zotode nako, Deo kha oza kakawade powa bihi-akhode khamishahari, naraa makhidehe ponakoshawizapa pina khi, toshonikhima nahari nade.

Naharideni nathidenipa, samaritano khamishahari nade. Judeudenipa, Zesho kha madihadeni, samaritanodeniza nakasherakhiri nawi nade, powadeni: "samaritanodenipa waidirakhiri nawi, hiremanawi" kena tawi nade.

Naraa samaritanopa makhidehe ponakoshawizapa khi tazapa, wati towanawi nahari powaza. Nazapa pokha shore etero mahikoniza [pedaço] shoke inakoshezape, pokha burro tetepiza etharizapa, iakhahari nahua wahi, hotelza inebohari nade. Naharo oza hinedeza samaritano zinero da inaharo nade, nahari makhidehe koma tahari ekawahari, tonomi nawi wahine, nade.



Nazapa Zesho Deo kha wima mamarideza wati tahari nade: "nahari makhidehedeni pama tohari naa, hawi toharideni, koharina pina 'ahakhahari koma taharipa ozabora kha', naharitha?" nawi nade. Nazapa Deo kha wima mamaride wati tahari: "Naharina wati wanee hinede", nawi nade. Nazapa Zesho powaza wati tahari nade: "Tia nema tahi!", nahari nade.

Hee, Zeshopa: "tiadeni pina padresha tikenahi!", naharawi nade, "pina pastorsha tikenahi!", naharawi nade, naraa powa athipa: "tiadeni pina samaritanosha tikenahi!", nahari nade. Naraa judeudenipa, pina Zesho kha Madihadenipa, "samaritanodeniza ikhahimana" kenaharawi nade, pina Madiha Kulinama kenahari, nade, kariwa nako "Madihadeniza ikhahimana" kenaharawi.



Hidapana Zeshopa hidakha naharo eti wanee kha wima wati wati napomazapa, Madiha pina samaritanosha kenanaha, Madihazara wa wa nawi towiraa.

Naharo kariwadenipa siba taa "iape cristão ikehenani" kenaraa, kariwa sibera taa kariwa bikerani awemanaharideni bihideni akho akho ikanabakhimana nahari. Naraa cidade bazimaza kariwa bikerani awemanaharideni hikaharawi.

Governo nako, zinero zoshe zoshe inani, cidade bazima wahi, taminerakhiri nahariza hemezi ani ani nawi wahine, aula ani ani zanaponi wahine. Naraa prefeito siba taa, prefeito bihi akhoden deni kenaharideni naharo zinero iidihizemana naharo. Nazapa, powadenipa denima tamine tokeheraha zanapowi naraa, taminerakhiri-naharidenina waidirani awemana awemana zanapohari.

Naraa Madihadenipa, idideni-kha-tonawathanihiza-hee-kenaharidenipa, "tipemihili" kenaharawi, naraa manako aha wahi da, aha wahi da kekenanahari, pina zamatapa, pina mashito, ensada, toto, dahoni, motor, naharo naki, powadeniza bika tani wahine, bazima madimanawisha tawi wahine. Madihadeni bobode tokhehenawi nako, kariwa wa wa nawi nako, "obihi akho tikanemanahi" nawi nako, Madiha siba taa bihideni akho akho



ikanabakhimana nawi.

Hidapana, imithani towi biki tee Zesho kha wima, pina Deo kha dakorenihi kha wima, pina Deo zoto peideniza bika tawi kha wima.

Zeshopa taminerakhiri-naharideniza, zoto peideniza "Deoza hee hee tikena nahi!", wati wati nanaha nahari. Powadeniza mari mari zazanapo nahari nade, "Deopa tiadeniza wahira tawi. Zinero tikapiremanaraa, kariwadeni tiadeni shamokhiri naraa, papeo shamokhiri tikeneraa, tepideni mopokhiri nehereraa, nema nee Deopa tiadeni towi nawi", Zesho athi.

Zoto peideni Deo kha wima mamarideni kha marinihi mithemana, mithemana naraa, marinihiza nowereamanahari, nade. Naraa Zesho athi, "Hee, Deo kha wima mamarideni wati wati kenawi siba taraa, tetideni tizaboradeni khaza wanakhiri nanipe, Deoza naki teti wana tanipe, pepehi, bika tani, nazapa Deo nako tiadeniza bika tawi towi", nahari nade.

Zesho athi, "Deo kha wima mamaridedeni, judeudeni siba taa Deoza dakorakhiri naharideni, naraa, kariwa owaa, centuriãopa, soldadodeni kha tamine, judeu hararaa, powapa Deoza denima dakorahari", nade.

Nahari soldado kha taminepa, powaza tarabaia nahari, naraa koma tawi nade. Nazapa, soldado kha tamine powa towira wati watohari nade. Nazapa Zesho pokha cidadeza bakho naza, cidade onini naki Cafarnaum, soldado kha tamine Zesho towi tokhahari nade.

Nazapa Zesho: "Hee, tikha oza wahi okhani towi", nahari, naraa soldado kha tamine athi: "Poni, okha oza wahi tikheherahi, da neherani, owape tikha madiha oheherani", nahari nade. Nazapa Zeshoza wati tahari: "tethi ohari nee wati tinezape, owa obihi-ahkode khakhariwi towi" nahari nade. "Owa naki okha tamedeni athideniza hee onani wahine, okha soldadodeniza naki zoshe zoshe oonanani, pina "tikhanihi" onani naki, tokhaniwi towi, neraa "tikhahonahi" onani naki, khahonawi towi. Owa obihi-akhodeza naki "nahari tinawatoho" onani naki, owathiza inawato inawato nahari", nahari nade, soldado kha tamine athi.

Nama nawi Zesho mithazapa, "ao, neheko towi, powa Deo kha dakorenihi hinedepa, pina okha madihadenisha nahararaa, powa denima Deoza dakorahari", nahari nade. Hee, Zeshopa zoto peideniza: "kariwa kha marinihi bazimaza hee tikeneherahi" nahari, madiha owaa tamine nako, religião onii kha tamine nako: "powa Deo kherene kha nawatonihini hinede" nahari nade, Zesho athi.



Hee, Zeshopa bazimaza bikanihi anirizani wahine nahari nade, pokha madihadeniza, zoto peideniza, madiha owaadeniza nako. Naharo, Zeshopa wati wati nanaha nahari nade, pina bazima ia ani tabakhimanawisha tawi kha wima, pina eti wanee kha wima, pina Deo kha dakorenihi kha wima.



Naharo wima Zesho wati wati nanaha nahari, bazima kabikerara kanawi wahine, madihadeni Deoza nako kabikerara kanawi wahine.

Kariwadeni, bíblia naki pecado tamineni wati wati kekenanani. "Neheko pecado?" tikenanehe. Pecado kha wima pina zori tani kha wimama naharo.

Hikarini kha wima nawatokhiri inezape, hidapana Zesho kha pecado kha wima imithani da nani.

Ikha pecado hinipe, ikabikerara kanani da neherani towi, Deoza naki ikabikerara kanani da neherani towi.

Pecadope pina kariwa taminekhiri naharidenipa zoto peideniza zoshe zoshe kenazapa, ohi ohi kenaraa, nema naa powadeniza denima zoshe zoshe kena tawi. Wadie naki pecado, akhowe

naki pecado, hazire kha manako naki pecado, naharo bazimape ikabikerara kanaharo kha wima nahika teza.

Kariwa madihadeniza: "tiadeni crente tikehenahi, pina kariwa crentesha tikenahi", kekenanaraa, naharo wima naki pecado, naharo wima hini Madiha kabikerara kanaharawi towi, Madiha motadenipa pina ididenisha kenawi naraa, owaa motadenipa pina kariwa crentesha kenaza.

Tabako tomi tomi tikenanipe, tepideniza naki mamore shipawariniza shaka shaka tikenani, tikha nomie tinawaidirani towi nitide, neraa pecado herani, pina tikabikerara kanani da nani, Deoza naki, tikabikerara kanani da nani. Eheteza, poo ithomeza tiadeni pashini ze tikenawi nako, pina ohizama ze tikenazapa, bokenihi nowerezape, pecado herani.

Kariwa nama nahari kahi tawi: "crente tikehenani wahine, bíblia kha wima wa wa tizanapomanahi, igrejaza hiri hiri tizanapomanahi" kekenanahari. Neraa tiape: "pahima onani" tezape, pepehi, tia nawato tinani, pecado herani.



Zesho athipa owaa: “tibihideni akho akho tikanarizezape, timadimananisha tani towi” nanaha nahari.

Zesho wati wati nahari nade: Madiha kaphira nahari bihi akho tikanawipa, nahari Madihazapa, Zesho bakho tinawi towi. Powa athi: Madiha pemiwiza hhipa da inezape, pina Zeshoza da inaharisha nawi kahi tawi. Madiha etero kaphira nahariza etero da inezape, pina Zeshoza da inaharosha nani kahi tani. Madiha khi khi inaharawi nako powaza ikha ozaza “tedahi” inezape, pina Zeshoza “tedahi” inaharosha nani kahi tani.

Naharo wima bibliaza anini, Mateus kha evangelhoza, capítulo 25za.

Hee, Madiha idideni kha tonawathanihideni siba taa pahirenisha tani Zesho kha marinahaza.

Madiha oza kaharihara kha naki, aba, bani, awa bono siba taa kahimanazapa, Madiha owaadeniza da inabakhimanawi towi. Naharo Zesho kariwadeniza mari mari nanaha nahari. Naraa, kariwadeni hiremanawi, powadenia akharakhiri naza, motadenipa pemi ohi ohi kenawi, kahi tawi.

Madihadeni kha tamine nako tarabaia nawi kahi tawi, powaza, comunidadeza naki tarabaia nawi, powa teshedeniza nako zoshe zoshe naharawi, powaza tarabaia kenawi wahine. Naharo wimape Zeshoza pahireni.

Naraa kariwa tamine siba taa powadeni teshedeniza zoshe zoshe kenawi kahi tawi, taminedenipa hashi kenaha zanapowi nawi wahine. Kariwadeni kha tamine siba taa powadenia zinero, mercadoria dama dama iikena naharo, powadeniza tobikehe zanaponi naharo, naraa kariwa motadenizapa tobikani da neheraharo.



Kariwa Zesho tamine wati wati zanapomanahari, pina Zesho totozona nahari tamine, powa zozokhe nahari tamine, naraa Zesho kha marinaha kariwa mithemanawi da naharakhawi. Hidakha kariwadeni Zesho kha marinaha bazima mithemanawisha tazapa, “iape owaidiree hinede ikehenani” kenawi towiraa.



Hidapana nako madiha sibera taa animanawi powadenia nanarizemana nawi, “iaza” kenawi, damamarawi: Madiha animanawi, kariwa aba dadamadedeni Madiha kha korizaza, bihiniza hawi tohezimazapa, madiha powadenia kenaharideni kariwa athiza “hee” kenawi, zotode nahari madihadenizara manako anini wahine.

Madiha animanawi nako, kariwa awa kakadedeniza “hee” kekenanawi, kariwa bani totodedeni athiza nako “hee” kekenanawi, manako wahine. Nama nama kenazapa, kariwa madiha taparideni hipemana hipemana zanapohari.

Ahimanezape, madiha sibera taa powa zamasha naa kahimana kahimana zanapohari, naraa madiha motadeni siba taa ai ai tokenahari.

Naharope Zesho wa inani nade pecado, nawi nade.

Madiha sibera taa idihizemanahari tamine tokehenawi wahine, professor tokehenawi wahine, agente de saúde tokehenawi wahine, ve-

reador tokehenawi wahine, conselheiro tokehenawi wahine, associação kha, organização kha presidente tokehenawi wahine. Nahari Madiha bazimadeni tarabaia kenawisha tazapa, pokhadeni Madiha b a z i m a d e n i z a tobikehezanaponi nani towi, kabikerara kanawi towi.

Naraa, naharideni Madihadeni pina

kariwasha kenazapa, pina “iazara” kenawi, damamarazapa, madiha powadeni teshedeniza zoshe zoshe kenazapa, bazima powadeniza towaidirarizani towi. Madiha nama naharidenipa, Zesho “makha bedi” wa inabakhahari nade, “raposa” wa inabakhahari nade. Raposapa pina kahawirisha nahari nade.

Hee, khi inani hidapana, Madihadenia idideni kha marinaha kahimanazapa, Zesho kha marinahaza wahihira tawi,



naraa kariwadenina wahihi takhawi. Nazapa Madiha: “Zeshoza hee onana onaharo” nawi nako, Madiha tohawi nebowi da naharawi. Powa ididenisha nazapa, powa zabora-khadeniza wati wana tawi da nawi, bazima kabikerara kanawi wahine. Naraa powa nako Madihazapa mari mari zanapowi da nawi, wadie nowerani wahine, hazire kha manako nowerani wahine, kariwa awa wiwishidedeni, aba nanahikadedeni: “tikhadeni zamaza bara inana, tiadeniza manako da inani towi” naharideniza Madiha “hee” kenaharawi wahine.

Madiha nako animanawi, ididenikha marinahaza hee kenaharideni, powadeni nako ahie hiri hiri kekenanahari, tokorime kha wima mithemana mithemana zanapomanahari, ithomeza, eheteza nako ithomemana tawi, naharidenipa powadeni Madihadeni, naraa powadeni nako Deoza wati wati kena tawi. Naharo wimape zori teherani, Zesho wati wati nahari nade: “Deo wahira tawi Madiha bazimadeniza, pina ‘Deoza wati onana’ tani naki, wati wati tahi, mithawi towi”.

Hee, judeu fihehereza, católico fihehereza, evangélico fihehereza, cren-te fihehereza, naraa “Deoza wati onana” tezape, pepehi, nema nani da nani.

Pepehi.





## Álcool kha wima

Hidapana kasasa, álcool tamineni wati onani towi.

Madiha bazima nawatokhiri nawi, kasasape hirani, Madihaza bikera tani. Madihakha aldeia bazimaza, bokenihi ani ani zanaponi, Madiha kasasa ze kenazapa. Bokenihi powadeni owaadeniza, bihedideni powa hidobadideniza nako boke boke kenawi. Madiha powadeni imekotedeniza boke boke kenazapa, Madiha kahi tawi, aldeia onii wahi hahawi tohabakhi nahari. Naharo bokenihizape, koshiroza, mashitoza dama dama kenahari kahi tani, totoza naki dama dama kenawi. Nawi nathipe, Madiha taho taha kanimahari, totoza naki zokheha kakanima nahari. Hee, Madiha aharideniza kasasa sawa tani tokhezimeraa, wapideniza emene maphara tani tokhemaharo.



Nahuaza naki, Madiha kasasa hini cadeia tokhehenemanaha nanaha nahari, cadeia bodiza pemi awemanaha kakanima nahari.

Madiha kasasa ze kenaza, nahua inidiza poponeri nazapa, kariwa zopi inaza, “khi, Madiha pina porokoma nahari” kekenanaha nahari.

Madiha imei, imeni kenaharideni nahuaza kasasa ze kenawi nako, bedideni pemimana taha, kaphinemana naha kakanima nawi.

Madiha ehedeni bedi kahamanaharideni

nahuaza álcool ze kenazapa, powadeni bedideni ani tabakhimanawisha taharawi. Ehedeni pina nanahizosha kenawi, nazapa zamakoma nako warimana warimana zanapowi. Bedideni motarakhiri nawi animanawi nako, imeideni kasasa ze kenazapa, powadeni nako ze kenawi kahi tawi. Nezape, zowatodeni kasasa ze kenezape, kariwadeni ihabakhimanani towi, imeideni shamomo tazapa. Naharo zowatodeni zamakoma pina zokheri komama, sífilis, Aids warimanani da nani, hiwemanani naki da nani.

Zabishodeni, zowatodeni kasasa ze kenazapa, wima bikani wati tineza, “hee” kenaharawi towi, pina tethiza howa howa kenawi towi.

Kasasa, álcool ze ze kenazapa, Madiha watideni towaidirawi kahi tawi.

Naharo bazima kasasa hinipe, towaidirehe zanaponi nani kahi tani.

Wahano hikaka kanapohariza, Madiha kasasa komani hini zokhezanemanawisha tawi. Madiha kasasa ze naharawipa, weniza, korizaza, bihiniza zokhezanemanawi da naharawi, kona, bohe nawatoto tahari, powadeni ani kenawisha tawi. Madihapa pina hashikama nawi pashoza.





Naraa, Madiha kasasa komanipa, pina anonama nawi: pashoza shoniphawipa, zokhezana tawi.

Wahano hikaka kanapohariza, pashoza zokhezanemanahari onideni nako: Bau kha Tiniha, Bau kha Manoe, Eiru kha Miri, Medonho kha Hosama, Medonho kha Toroso, Cacau kha Toweza, Degredo kha Sese. Naza Madiha motadeni nako kasasa ze bote tokhehenazapa, zokhemana zokhemana zanapohari. Hazireza nako Madiha kasasa ze kenazapa zokhemana zokhemana kahi tawi.

Madiha bazima nawatokhiri nawi, makha ophina tawi, Madiha nazokhewi da nawi. Nezape, makhaza ithomemanaharawi, Madiha makha khi kenazapa, idemana tawi. Madiha makha idemanaharawipa, naharo zamaza animanawi da naharawi, hawi tohani tawi. Wahano hikaka kanapohariza, Madiha sibera taa makha hine zokhemanahari, naraa, kasasa komanipa zokhewi siba tawi. Naharo, kasasa pina makhama naraa, denima ophina bote tohani. Madiha makha itawakhemana itawakhemana naraa, kasasape “itabarona” kenaharawi, mitha kenazapa, iakhanimana iakhanimana naharo, aldeia wahi.

Maithakhazamape, Madiha pashinira nawatoto takhawi nade. Madiha ehetezara pashini ze ze kenazapa, pashini powara álcool kahimerawi ze ze kenazapa, shene tarimana tawi, ahieza, ithomemanaha kanima tawi. Pashini ahie wahine da nawi, pina ehete wahine.

Kasasape da neherani shenenihi wahine, Madiha biki tee ze naraa, mona toha tawi, tokhawisha taharawi, wati tawisha taharawi, kahi tawi.

Kariwa nako shenenihi bika tani wahinepe, kasasa ze kenaharawi, pina vinhora ze kenawi kahi tawi. Kariwa-taminera-taharidenia kasasa ze ze kekenanahari, kasasa watini hapari teza.

Pashinipa ehete wahine bika tawi, naraa hidapanapa amonehedeni pashini nawatonihini nema zanapomanani, ehete hirani, ahie hirani, ithome hirani. Hidapanapa Madihadeni pashini zenihira nama zanapomanawi, pina nokhodeni shei tokanirewi nama zanapomanawi wahine.

Madiha siba taa nahua wahi hawi tohaniwipa, “hina, passeia inanina!” kekenanahari. Nazapa, Madiha passeia kenazapa, pashini towi kenaraa, nahuaza, pashini noweraa, kasasa anini. Nazapa, ahahari Madihadeni kasasa ze ze kekenanahari, nazapa, pokhadeni hawi cidadeza waidira tani.





Amonehe kha Makhidehedeni kasasa zehidederaza, amonehedeni siba tee makhirinideni nebomanehe kanimani, nahari makhidehedeni bedimenideniza wakha wakha kekenanaza.

Kariwa wati wati kenahari, “madiha nahuaza kasasa ze hidederawi” kenaraa, taidepa, kariwa powadeni kasasa aldeia wahi iakhemanapoharo nade, madiha kasasa ze kenapowi wahine.



Madiha kasasa komani awawipa, kariwa athiza hee hiderawi. Kariwa “tikhadeni korizaza aba onahikana” naza, madiha hee kekenanawi; kariwa “tikhadeni zamaza awa ka inana, bani zedi inana” kenawi nako, madiha hee hee kekenanawi, kasasa manako wahine hee kenaha zanapowi nahari. Madiha kasasa komani awawipa, kariwa madiha bedimeni mitha tozawi nako hee nawi kahi tawi.

Maithakhazama, kariwa athi nama nahari: “madiha zokhemanawi wahine kasasana bika tani, totoma neherani, denima bika tani”, kenahari. Nazapa, maithakhazama kariwa totoza madiha toto inabakhimanaza, madihadeni manako bobaza shite shite ikenahari nade, koshiroza nako ihinedeni aawemana nahari nade. Neraa, kariwa madihadeniza kasasa da ikenabakhizapa, madiha powa teshedeniza boke boke kenahari, nazapa zokheha kakanima nahari, nazapa madihadeni “hee, kariwapa bikaka tawi” kekenanahari.

Nezape, kariwa wati wati kenahari, “madiha kasasa ze hidederawi” kenazapa, tibodideni watomemanahi, powadeni taide madihadeniza kasasa da da ikenapoharo nade.

Madihadenikha wawatiza, tiadeni wati wati tikenaharo kasasa tamineni. Nazapa, taminedeni wati wati kenahari “kasasa zenihi inebona!” kenahari, nazapa madiha owaadeni athipa “hee, kasasa ineboni towi!” kenahari. Neraa, wada oniikhazape, kasasa ze kenapoma tawi.



Madihapa siba taa pina daphophosha kenawi, daphopho lamparina hororo nahari khi neza, zokheha kanima tawi, madiha nako kasasa khi naza, nama nahari.

Madiha “viciado” nako animanawi, Madiha powaza kasasa tobikanipe, kasasa nebowi da naharawi, zenihi nebokoshawipa, takaka, takaka nawi towi.

Hidapana, obodi wati nani: neheko towi, kasasape owaidira bote toheraa, Madihadeni zenihi nama zanapomanahari?

Madiha sibera taa kasasa ze ze kekenanawi, kariwa nophine kaphinemanazapa: ahahari madihadeni kasasa towi kenahararaa, kariwa powadeni towi wa wa kenazapa “hari, ze inana, tiape oteshe tihani, tiaza bika onani” kenazapa, Madiha “hee” kekenanahari kariwa athiza, Madiha “pahima onani” nawi da naharahari, “kariwa owaza bokerana” nazapa.



Owaadeni kasasa ze ze kekenanahari powadeniza wati tani ophinera tani wahine. Kasasa ze kenaharazapa, powadeniza wati tani ophina tani, wima pahishee kha wati kenaharawi, nokhodeni bikawipa. Nahuaza naki, kariwa athiza wati kenawi wahine, kasasa ze ze kekenanahari, kaphinemanerawi nophine. Hee, pahisha, Madiha animanawi, kasasa ze kenazapa, kariwa athi denima wati kenawi damamarawi. Kariwa athi wati kenaraa, kariwa athiza wima naharora inahari khimana tani. Nezape, kariwa “hao, naharo imithemanini da neherani, wimarideni oharikhini” kena tawi.

Nazapa madiha owaadeni nako kasasa ze ze kenahari, watideni hamemanawi wahine, wima waidira taharo bodideniza aniza. Powadeni bodi ohi ohi kenazapa, powadeni pemimanazapa, “hee, kasasa ze onana, owati himani wahine” kekenanahari.

Nazapa madiha owaadeni pokhadeni hawiza nako kasasa ze ze tatanimana nahari, “agüenta inani wahine” kekenanahari. Neraa, naharo hawipe ophinee kha, kasasa komani he tinezape, pashoza tizokezanani da nani towi. Nezape batelãoza naki kasasa komani tezape tedani ophina tani, he tinezape, tikhaniherani towi.

Hee, owape, obodi wati nani: Madiha kasasa ze ze zanapomanaharipa, maithakhazama kha ehete towi watideni watoma watoma naza witide, onani.



Madihadeni taidedeni kha khi onabakhiharipa, ehete, ithome nanawatomanana nakhade. Neraa, hidapanape, ehete tobiki, ahie tobiki nani. Aldeia animanani sibera tee, ehete, ahie nowereraa, forroa, tozoto piko piko khaa ani ani zanapoharo. Madiha kha ehete pahishee khazape, zozobide ani, ithome ani, hhipa bazimaza ani, pashini nako ani, watizee naki ani, kabikerara kanawi naki anini. Obodi wati nani, Madiha naharo watizee towi kenazapa, kasasa ze ze kenahariwitide, “naharo biki tee watizee poni nathini iaza khanipomana” kenahariwitide. Neraa álcool ponirape iaza watizee nowerani kahi tani, kabikerara kanawi nako da neherani towi. Kasasa ponira, álcool ponirape pina ponimara tetiza watizenihi nowereraa, ponimara haha haha tani towi, nezape, bokenihi towira tikenani towi, okashera tani. Kasasa ponira, pashini powarapa ehete tinawatomanani da neherani towi. Comunidade bazima “hee” kenawipa, “ehete bika tani inawatomanana” kenazapa, da nani towi.

Tiape “Hee, pahisha, kasasa ze onimani da neherani” teraa, wada shiwahape, ze timanini towi. Tiape “kasasa onebona” tanipe, tibodi wati nani da nani, pina “neheko towi, kasasara ze ze oonanaharo” tahi, “neheko onawatowi wahine, kasasa oneboni wahine” tahi, tibodi.

Madiha animanawi, “nahua wahi hawi ihanina” kenaharawi, kasasa zenihini nophinini. Nezape pokhadeni aldeiazara kehenaha zanapowi nahari. Naharideni Madihapa dakorakhiri nazapa, kasasa zenihini nebomanahari.

Hee, owape Madiha sibera taa khi onabakhiwi, taidepa, kasasa ze ze zanapomanapoharide, nazapa, kasasa hini ohi ohi kenahari, tokomeikhimanahari. Nazapa, powadeni bodi wati kenahari: “Hao, okha zinero botequimza da onimanini da neherani, okha amonehe naki owaza boke boke neboni wahine, kariwadeni owaza zophi zophi nebomanawi wahine, okomei okomei oneboni wahine, kasasa onebona!” kenahari.

Hee, pahisha, nahari Madihadeni dakorakhiri nazapa, kasasa nebomanaharide. Nahari Madihadenipa, hidapana powadeni teshedeni nako wati wati zanapomanahari, naraa powadeni teshe powadeni athiza howa kenawi da naharawi, pina “hee, imithana” kena tawi.

Pepehi.



## Tuberculose kha wima

Tuberculosepa Madihadeniza hikeherarizani. Madiha siba tawi tuberculose wahine hemezi daphide, pina Rio Banco wahi, pina Manao wahi, naraa Madiha siba taa taide Eirunepéza, zotode pokhadeni zama wahi hemezi daphi daphi kenahari. Madiha tonomimanaharipa animanawi, naraa Madiha owaadeni nako animanawi, wada sibera tani hemezi nebomana tawi, Madiha owaadeni siba tawi nako animanawi, tuberculose komene zokhemanawi, ime hokowi, ehedeni nako siba tawi zokhemanawi.

Hee, tuberculose hikawi da naharawi, Madiha tuberculose koma tawi polo-baseza bakho bakho kenawi. Madiha tuberculose wawarimana naharideni koma bote tokehenazana, wada siba teza, waza bote tokeheranazana, ama phito phito kenazana nahua wahi, polo-base bakho bakho tanimanahari.

Tuberculosepa zamakoma ophina tawi kha Madihadeniza anihari.

Nezape, Wai bodini wati nezape, "Madiha kha tuberculose kha wima inebokoshani da neherani, Madihadeni powadeni athi omithana", nade, "tuberculose tamine". Nezape, Madiha athi tuberculose tamine



grava grava nanehe naharo. Tethideni grava grava nezape, poniza mari tikenaharo: neheko Madiha bodideni wati nawi tuberculose kha wima, nehekoma naza tuberculose wawarimana nahari, komanaza nawato tawi Madiha tuberculose kahiwi, komanaza Madiha tonomiwi da nawi, komanaza maithakhazama totonomimana naharitha. Naharo wima grava naharoza, Wai towathani motarani.

Hee, hidapana nawato tani, Madiha siba taa nawato khiri kenawi, komanaza Madiha tonomiwi da nawi. Pina taide hemezi hospitalza, polo-baseza dama dama tokenawi, pina hemezi ohari naharawi, siba tawi, pina hemezi ze kenawi abaziko 6 kenawi wahine,



pina tuberculose wahine hemezi nebokoshemanazapa, tuberculose powa nathi khani tawi da nawi, naharo kha wima bazima Madiha nawatokhiri kenawi.

Madiha nako nawatokhiri kenawi, komanaza tuberculose komene koma koma



tokenahari: Madiha thoho thoho kena tawi, shiwaha bote, zome nama zanapomana tawi, wada siba teza; wapideni nako phoko tokenawi, Madiha nako waza kena tawi, tohoomana tawi, nazapa, shonoba ama naa phito phito tokena tawi. Nama zanapomanazapa, wada siba teza, abaziko siba taza, Madiha polo-baseza bakho tokena tawi, tonomimanawi wahine.

Nema naharo shamo tani,

kowahi tuberculose khakhahona nahari. Degredo kha Mahawa tuberculose koma teraa, hemezi daphi tezape, tonomiharo. Poni Waiza wati taharo, neheko towi Madihadeni shamokhiri kenawi tuberculose kha wima. Poni athini: „Okha zamakoma herani, 'dori' kenade, zophinehedeni athi. Zamakoma ranehe, neza doutordeni khi khi kenanehe: 'hee, tuberculose teriharo, dori herani' kenade, kariwadeni, doutordeni owa khi kenezape”, nade.

Kariwa pina médicodeni, enfermeirodeni athi pina “tuberculosepa zamakoma” kena tawi, naraa Madiha siba taa bodidenizapa: “zamakoma harawi” kena tawi. Hee, bodideni shamokhiri nawi, “kohari kha tuberculose warihari?” kena tawi, wada siba tani, khi nawi da naharakhawi, zotodepa, ohizama koma tawi, kahi taraa, anibote tohazapa, Madiha zokhebote nawi kahi tawi; zama kha hemezapa nako da naharawi. Hee, pahisha, tuberculosepa pina dorima nawi: ibodiza ani tawi, waza inani kahi tani, ibodiza tuberculose boke tawi, ophina tawi, izokheni da nani, inomini wahine naki naho tani. Naraa, madihadeni athi: “zophinehe dori toma ineraa, tuberculosepa denima tawi kahi tawi”, kenahari.

Nema naharo, “shamo inani” kenawi, Madihadeni, “neheko tuberculose inaharo, pina zamakoma nahararaa, pina dorima naharawi”, kenawi. Nama nahari, Madiha tuberculose anizapa, shamokhiri nawi, zophinehe khi ikenaharaha, médico nako khi ikenaharaha nahari.



Madihadeni "tuberculose" kenahari, "thothoho" kenahari. Madiha animanawi, "tuberculosepa ethiza thothoho" kena tawi, naraa Madiha owaadeni animanawi, "thothohopa dori".

Madiha owaadeni "thothohopa dori onii" kena tawi, owaadeni "zophinehe kha thothoho" kena tawi. Imithani wahine, neheko thothoho? Taide, ididenipa "thothoho" kenaharawitide, naraa, kariwa Madiha kha zamaza bakho tozimemanazapa, tuberculose Madihadeniza shaha tahari, shaha tazapa, naharo zamakomaza idideni "thothoho" kena tawitide? Wima onii nitide, pina kariwapa Madiha kha zamaza nowerakharaa, thothohopa anirizapohari, pina dorisha naraa, dori onii nitide?

Wai athini nema naharo: "Owa, Wai, nawato onani, tuberculosepa, kariwa kha tuberculosepa zamakoma: Tuberculose hinedepa pina bactériasha nani, naharo bactéria oninipe: bacilo. Bacilopa khi inawi da naharawi, naraa, khikhizapa, khi inawi da nawi. Naharo bacilopa imeza tokhezima tawi, nazapa, imeza shaha tawi, nazapa koma inani kahi tani, tuberculose komene. Hemezi daphi inazapa, hemezipa bacilo nazokhe tawi. Bacilo bazima zokhemanazapa, tuberculose komene epiza hikawi towi.

Bacilo bazima hikawisha tawi wahinepa, hemezi ze tikenawisha taza, abaziko 6 meses kha nawipa, bikakhiri tikenani towi. Madiha hemezi daphi nawi wada sibera tezape, tonomiwi nawi towi, naraa hemezi nebokoshazapa, tuberculose kha bacilo motapa denima tobazimanapomawi towi, Madiha bodiza", nani, Wai athini.

Naraa, Wai athini: "Owape shamo onakhani, nani, thothoho tamine, Madihadeniza denima owathana oneraa, thothoho kha wima, ia bazima ikawatherana ineraa, neheko thothoho, neheko tuberculose inaharo, powa ohariwitide, owaa ani witide, inaharo. Nema naharo denima nawato inani towi, imekote kha wima nawatokhiri inana inaharo, tuberculose komene aniwitide, nowerawitide inaharo.

Nema naharo tuberculose kha wima ani naharote nani wahine, Madihaza shaha tabakhirawi nophine, pina Madiha tuberculose komene koma taza, hemezi towi nahua wahi tokhaniharite nawi wahine, tuberculosepa powa imekotedeniza toshonihizerawi nophine."

Pepehi.



## Aposentadoria kha wima

Aposentadoria tamine tiadeniza wati onana onaharo hidapana.

“Neheko wahine aposentadoria aniharo”, tikenanehe? Governo athi: “hadawibotedeni towiborimanawi tarabaia kenawi wahine danimaniharawi, nazapa hadawibotedeni aposenta inanabakhimana”, nahari, pemi ohi ohi kerawi nophineni.



Tiadeni nawatoto tinani, kariwa kha zamazape, zinero tikaphiranipe, tipemini towi. Nezape, bazima brasileirodeni fabricaza, firmaza, wizahaza tarabaia tarabaia kenaharideni, hadawi tokehenazapa, “aposenta inana” kenazapa, governo “hee” nanaha nahari.

Makhidehedenipa pokhadeni wahano 60 anos kanawi wahine, aposentadoria wahine, amonehedenipe 55 anos kanani wahine, ponikha wahano.

Madiha kha zamazape, hadawibotedeni pemimanawi danaharawi, powadeni bedideni, hidobadideni powadeniza

zamatapa da da zanapomana tawi. Neraa, governokha wima dakhorezape, bazima hadawibotedeni kariwadeni, Madihadeni, aposenta aposenta kenahari.

Aposentadoriape pina koshiro kadidikhimanima naharo: Naharo koshiro kadidikhima naharope ani tanisha teheranipe, taho tinani towi, neraa, ani tanisha tanipe, bika tinani towi.

Aposentadoria kha zinerope salário mínimo oharinipe, 350 reais naharo. Madiha zinero kha wima nawato tawipa, naharo zinero biki teherani, bazi tani kahi tani. Naraa Madiha aposentadodeni animanawi, abaziko kha wada, zinero dama kenawi wahine, shamokhiri nawi: naharideni Madiha nahuawahi tonahohorahari, naraa zinero dama tokenaharazapa, kariwa kha lojaza dihi kenaha zanapowi nahari, pina manakoni hirani mimithade tokehenahari. Madiha aposentado owaadenipa wada pahireza nahuaza bakho nanimanahari, zinero dama tokenawi wahine, naraa Madiha siba taa nahua wahi ekhabakhinimana ekhabakhinimana nanaha nahari, nazapa, pemi awemana awemanazanapohari, nahuaza, pokhadeni hawi wahine moto phahani mitha kenawi wahine nako zinero ani ani keneherani.





Madiha aposentado owaadeni nako kahi tawi, mamaiza totokehera nawi. Powadeni zinero kha wima shamokhiri nazapa, matematika kha wima nako shamomo tazapa, kariwadeni ikamazaibakhimana nahari, Madiha powadeni imekotedeni nako ikamazaibakhimana nahari.

Aposentadoria kha zinerope pina salário mínimo oharini abaziko kahariwi kha.

Hidapanape salário mínimo kha wima 350 reais nakhani. 350 reais nanipe pina 50 reais anini 7 naharo. 50 reais kha zineroya zomahi korime aniwi. Aposentadoria kha zineroya zomahi korime 7 nawi towi. Naharo zinero abaziko kahariwi kha 350 reais naharo pahi, tobikini daneherani. Kariwa tiadeniza "hee, tikhadeni zinero biki tani" naza, "hee" tikenani tideha, tiadeni tokamaizabakhihari.

350 reaisza, moto phahani 40 litro mitha tikenani da, sao saca oharie, sabao caixa kaharie, rizi kaharie, panera oharie, mashito oharie, paora 5, poleta 20, shiwiro 2 dúzia nani, shiwiro madoni tonine imei kahariwi, bermuda oharini, etero tetepikha oharini, borasha 5, kape 5, asoka 5 mitha tikenani da nani, denima aba 8 kilo, pariza 10 litro da



nani, nahuaza fihipemanani wahine. Naharo bazima 350 reaisza mitha tikenani da nani, tiadeni tokamaizabakhiherezape.

Neraa aposentadodeni pokhadeni cartão kariwa cidade abarideniza inebobakhimana inebobakhimana nawi. Naraa, kariwa siba taa Madiha totokamaizabakhimana nahari, comerciantedeni Madiha totokamaizabakhimana nahari, kariwa madihadeniza tarabaia kenahari Madiha mamaizadedeni nako animanawi.

Tia maizanihi towi tanipe, tikha cartão kariwaza da da tinaho. Neraa bikanihipe tiaza nowarani towi.



Tiadeni tibodideni wati nani “okha cartão loja hinedeza onebowi bika tawi”, titikena naharo, nazapa loja hinededeni athipa “bika tawi, hidapana siba taa mitha taza, abaziko owaazana paga tani wahine, tikha conta” kena tawi.

Neraa abaziko owaaza naharo lojaza bakho tinanipomezape, loja hinede “hee, tiadeni dihi tikenani pahi nani motarani” nanaha nahari, nezape tiaza hidi nawi biki tahari tizepe tahi, neraa “papahako” tatehe naharo. Naraa loja hinede bodipa haha nawi tia hahade.

Nezape, tizepe tahi mithade tikhezape, titeshe tiaza wati wana taharira, zinero onini nawato taharira “hina” tikanana, tia tizepe tahi mitha nawi wahine.



Nezape titeshe zinero onini nawato tahari hirawi tikhezape, loja bedeniza, bo-tequim bedeniza mitha teherahi, naharo loja bedeni hinededenipa siba taa tia kamaizemanawi towi, tikha zinero troca tanini naki, tikha zinero imenipe powaza tohani towi, neraa manako zinero bedeni siba tee tiaza da inani towi, neraa “pepehiki” tani towi, “zinero siba taharoki” tani towi. Hidapanape “mitha inana”

tikenanipe, loja imeni bote wahira hawi tiha hawi tiha nana, mithade, loja imeniza maizanihi sibera tani.

Aposentadodenikha zinero bancoza abaziko kapamani da nani. Nema naharo tiadeni nahua wahi abaziko kapama nazana hawi tihani hawi tihani nani da nani, nema nanina moto phahani hikani biki biki tani towi. Neraa abaziko kapamahari denima tanipe, tikhadeni zinero poni nathini tokhanini towi, governo wahi.

Naharo maquina “terminal” banco kha zinero khekhena naniza naki, banco kha kariwaza wa wa tikenahi, tikhadeni zinero dama inani wahine. Tikomeimana nani tideha banco kha kariwa nophine, naharideni kariwa naharope pokhadeni tarabaia.

Kariwa owaadeniza “iaza obihi akho tikenahi” tani tideha, tia kamaizarana.



Tiadeni aposentadodeni tikhadeni senha tikhadeni cartãoma ani tikenani da neherani, ophina tani, kariwa, Madiha owaa tikha cartão tikha senha naharo idi nanipe, tikha zinero powadenia dama ikenani towi.

Tiadeniza wati wati onaharo cartão tamine, naharo wima Madiha amonehe kha cartão senha naharo amoshinizape, bodini ohi ohi nadeha, ponikha zinero towi. Nema tikerana! Hidapanape, tikhadeni cartão powara, senha naki ponira tinanemanana! Nema naharo, Madiha, kariwa tikha cartão ibotizapa, tikha zinero dama ineherani towi, senha powaza nowereza.



Kariwa waidira bote animanawi, kariwa político nako animanawi, Madiha aposentadodeni nanaphinadedeni, powadeni aposentadodeni wati wati zanapomanawi: "tiadeni Madihadeni obihi akho tikanemaneherezape, tikhadeni aposentadoria hikani towi", kekenanahari. Naharo wima maizanihi imenibote kha, aposentadoria kha wimape INSSna pahi, naharona pahishee kha, INSSzape kariwa políticodeni, FUNAIdeni zoshe zoshe kenawi da neherani. INSSpe athini damarani. Políticodeni, FUNAIdeni tiadeniza mari kenawi da nani documento bazima tikahimanani wahine, aposenta tikenani wahine. Neraa tikhadeni zinero khahonezape, FUNAI athiza, políticodeni athiza nebokoshani da neherani. Nebokoshani wahine naki zinero dama tirani abaziko kapama tokahari nanipe, hikani towi. Aposentado zokhewi nako pahi hikarini towi. Kariwa tiadeni nanaphinadedeni, "tikhadeni aposentadoria hikani towi", kekenanaharideni, maizanihi hinededeni. Naharideni kariwadeni athiza "hee" tikenani tideha, neraa tiadeniza maiza maiza kenazapa, promotorza, promotoraza wati tikenana, pokhadeni maizanihi hikani wahine. Naharideni kariwadeni tiadeniza "hee, owaza tikha cartão tinebomanaho" kenazapa, "hee" tikenani tideha, promotoraza wati wati tikenana! Kariwa bazimadeni, FUNAI nako, da naharawi tikhadeni cartão powadeniza aniwi wahine. Ophina tawi.

Aposentadodeni animanawi, sibera taa, powadeniza moto mitha kenaha kanimawi.



Nema nani wahinepe, tikhadeni zinero abaziko 8 kanawipe tinakherikhimanani da nani, moto mitha tikenani wahine. Zinero wahano oharini kha tinakherikhimanezape, moto Diesel kha mitha tikenani da nani towi. Tiadeni tikhadeni zinero abaziko siba taa kha tikhadeni ozaza "ani inana" tikeneheranipe, Banco do Brasilha naki da nani, tikhadeni zinero aninisha tani wahine. Banco do Brasilha, conta tinawatomanani da nani, naharo conta onini "conta corrente benefício". Naharo conta tinawabani wahine naki, zinero manako nowerani, tia onini dozo nani shamo tinani naki da nani. Naharo contaza, ani tani da nani 1800 reais nee. Naharo conta hinedeza cartão owaa aniwi towi, weshe tawi. Nezape, tia tikha zinero imeni towi tezape, nahari cartãoza tia tikha zinero dama dama tinani da nani.



Aposentado animanawi pokhadeni zinero towi nahua wahi hawini hawini nawi, abaziko kha wada dia 1º za nahuaza bakho bakho nanimanawi. Naraa aposentado sibera taa abaziko kha wada dia 1º za powadeniza zinero ani ani naharo bancoza, aposentado owaadeni kha zinero wada dia 3za, dia 5za, dia 7za bakho nanehe naharo. Tikhadeni zinero towi wada siba tee nahua za tekawemanerani nophineni, tikhadeni banco kha papeoza, kariwa khaza extratoza, khi

tikenapohi, naharo papeoza tikhadeni zinero kha wada onini anini. Naharo wadazana nahuaza bakho tanimananipe, tikhadeni zinero dama dama tikenani towi. Neraa tiadeni bazima abaziko kha wada dia 7za nahuaza bakho tanimananipe, tikhadeni bazima kha zinero anini towi, bancoza.

Aposentado animanawi, pina hidapana pokhadeni zinero dama ikenani, nezape domiko pamezape, nahua wahi hawi tohanipomawi towi, khi kenawi wahine, "zinero onii bakho naki?" kenahari. Neraa, naharo wimape da neherani, zori tanikha, powadeni nenepemimana nahari nahuaza. Naharo domiko hikani 4 nezape, zinero onii ani ani naharo, bancoza. Governo zinero da inahonani ohari ohari naharo abaziko kaharizana.

Madiha hadawibotedeni siba taa, "abaziko" kenazapa, meme wahira bodideni wati kenahari. Naraa kariwa athipa "mês" nawipa, kariwa bodipa meme wahi wati naharawi, powa bodi calendárizara wati nawi.



Neraa calendário kha wimape onii, abaziko kha wimape onii naharo. Nema nezape, kariwa “hee, abaziko owaaza tikhanina” kenazapa, abaziko zati tekhawawi da neherani, calendárizara khi tahi, wada onini.

Madiha siba taa nawatokhiri nawi, amonehe aposenta nani wahine, ponikha wahano 55 kanawina da nawi, manako makhi aposenta nawi wahine, pokha wahano 60 kanawina da nawi. Tia hadani tikaha nanipe, tikha documentozara khi tapohi, tikha wahano nawato tinani wahine. Tia amonehepe, tikha documento khi taharo neraa 55 tikaphiranipe, aposenta tani da neherani towi. Tia makhipa, tikha documento khi taharo neraa 60 tikaphiranipe, aposenta tani naki da neherani towi.

Aposentadoria aninipe tiadeniza bika tani wahine. Aposentadopa wada pahireharoza nahua wahi khaniwipa, nahuaza pemiharawi towi.

A p o s e n t a d o p a  
abaziko siba tawi  
kha zinero  
aninanipe, moto  
mitha ikenani da  
nani, naharo bika  
t a n i  
aposentadodeniza,  
“ibihi komephi  
komephi nani, oori  
hini” kenazapa,  
M a d i h a  
hadawibotedeni.

Aposentadodenipa  
wada zori taharoza  
nahua wahi  
h a w i n i w i p a ,  
pemimanawi towi.



Hadawideni Madiha siba taa nahua wahi iakhanibakhimanawipa, pokha zinero sibera tee tokhasiwewera nani towi. Madiha aposentadopa kasasa mitha mitha nawipa, powa imekotedeni tezehe ze ze kenazapa, khiza inanabakhimana, delegacia wahi cadeia tokhehenaha, kakanima nahari, boke boke kakanima naha nahari.

Madiha hadawideni boboti totokahera nawi: taidedenipa, patrãodeni serika manako mercadoria biki tee da da ikenanehe naharo nade, Madihadeni totokamaizabakhimana nahari nade.



Zotodedenipa, marreteirodeni batelão abarideni nako Madihadeniza maiza maiza kekena nahari, zotodepa, awa kakadedeni nako, aba hohokadedeni nako nama nahari, mamaizadedeni. Neraa hidapana naki hadawibotedeni kha zinero boboti totoha naharo da neherani.

Ahiharo wima timithemanezape, tibodideni wati kenanisha tahi, "ikha zinero aninanisha tana" titikena nahi, tibodideni ohi ohi keneherani nophineni, tiadeniza tobikehe zanaponi nani wahine.

Pepehi.





CONSELHO DE MISSÃO ENTRE ÍNDIOS

---

Igreja Evangélica de Confissão Luterana no Brasil